

Penguatkuasaan perlu lebih tegas



Usaha lindungi hidupan liar, kekang sindiket pemburu haram antarabangsa

Oleh Asrol Awang
bhnews@bh.com.my

Kuantan: Pemangku Raja Pahang, Tengku Hassanul Ibrahim Alam Shah Al-Sultan Abdullah Ri'ayatuddin Al-Mustafa Billah Shah menggesa penguatkuasaan lebih tegas dilaksanakan dalam usaha melindungi hidupan liar terutama harimau di negara ini.

Baginda mengakui Malaysia mempunyai undang-undang untuk melindungi hidupan liar dan kawasan hutan, namun tanpa penguatkuasaan sewajarnya undang-un-

dang digubal tidak mempunyai sebarang makna dan akhirnya tidak akan dapat mengekang sindiket pemburu haram antarabangsa.

"Kita memerlukan agensi kerajaan yang bersikap tegas dalam melindungi hidupan liar dan habitatnya.

"Harimau Malaya disenaraikan dalam kategori sangat terancam di bawah Senarai Merah Spesies Terancam Kesatuan Antarabangsa bagi Pemuliharaan Alam Semula Jadi (IUCN).

"Disebabkan pemburuan haram dan kemusnahan habitat, dianggarkan hanya tinggal lebih kurang 150 spesies harimau ini di negara kita dan bilangannya semakin merosot setiap tahun," titah baginda menerusi kenyataan media semalam.

Tengku Hassanul bertitah demikian sempena Hari Harimau Sedunia yang disambut 29 Julai setiap tahun.

Mengulas sambutan Hari Harimau Sedunia, baginda mengingat-

kan ia bertujuan meningkatkan kesedaran masyarakat umum mengenai spesies harimau yang semakin diancam kepupusan.

Sambutan Hari Harimau Sedunia bermula pada 2010 apabila 13 negara yang mempunyai populasi harimau berkeliaran bergabung untuk meningkatkan populasi harimau termasuk Malaysia.

"Tahun ini, Nepal, India, Bhutan, China dan Russia telah dilaporkan begitu giat dalam usaha pemuliharaan populasi harimau.

Berjaya tingkat populasi

"Melalui usaha pemuliharaan yang berkesan dan kerjasama yang cekap antara semua pihak termasuk agensi kerajaan dan badan bukan kerajaan, negara ini telah berjaya meningkatkan populasi harimau mereka," titah baginda.

Bagaimanapun, Tengku Hassanul bertitah di sebalik segala usaha itu populasi harimau di Asia Tenggara masih mengala-

mi kemerosotan.

"Harimau Malaya melambangkan kekuatan, kekuasaan dan keberanian serta menjadi simbol kegemahan negara kita seperti yang dapat dilihat pada Jata Negara," titah baginda.

Sempena Sambutan Harimau Sedunia tahun ini, baginda turut berkongsi aspirasi sama dengan semua rakyat Malaysia yang ingin melihat populasi Harimau Malaya semakin bertambah.

"Sekiranya kita dapat bekerjasama untuk memastikan kesinambungan Harimau Malaya ini, populasi haiwan ini bukan hanya akan bertambah, malah kita sebenarnya juga berjaya melindungi hutan yang banyak menyimpan khazanah biodiversiti dan fungsi ekosistem yang penting, lebih-lebih lagi di Pahang.

"Justeru, saya menyeru semua pihak agar terus komited dan bersemangat untuk menyelamatkan spesies kebanggaan negara ini," titah baginda.